

Nunat Avannarliit Killiit Siunnersuisoqatigiiffiata kaammattuutit aalajangersagaanik nr. 2/2011-mik, ataani allassimasutut oqaasertalimmik, Inatsisartut tapersiinissaannik Inatsisartut aalajangiiffigisassaattut siunnersuut:

Nunat Avannarliit Killiit Siunnersuisoqatigiiffiata nunani avannarlerni killerni kulturimut naalakkersuisut kaammattorpai filmiliorneq TV-kkullu aallakaatitassiorneq eqqarsaatigalugu nunat avannarliit killiit suleqatigiinnerata annertusarneqarnissaanut periarfissat misissoqqullugit. Alloriarnertut siullertut immaqa ataatsimiititsisoqarsinnaagaluarpoq nunani avannarlerni killerni filmiliornermik TV-kkullu aallakaatitassiornermik ingerlataqartunit peqataaffigineqartumik.
(aallartitat siulittaasuat Josef Motzfeldt)

pillugu

**Kultureqarnermut, Ilinniartitaanermut, Ilisimatusarnermut Ilageeqarnermullu
Ataatsimiititaliap**

ISUMALIUTISSIISSUTAA

Siunnersuutip aappassaanneerpeqarnerani saqqummiunneqartoq

Isumaliutissiissutip suliarineqarnerani ataatsimiititaliaq ukuninnga inuttaqarpoq:

Inatsisartunut ilaasortaq Andreas Uldum, (D), siulittaasup tullia

Inatsisartunut ilaasortaq Hans Aronsen, (IA)

Inatsisartunut ilaasortaq Harald Bianco, (IA),

Inatsisartunut ilaasortaq Ruth Heilmann, (S)

Inatsisartunut ilaasortaq Aleqa Hammond, (S)

Ataatsimiititaliap siunnersuutip siullermeerlugu ulloq 3. maj 2012 UPA2012-mi suliarineqarnerata kingorna siunnersuut suliaaraa.

Siunnersuutip imarisai siunertaalu

Nunani Avannarlerni Killerni filminik TV-kullu aallakaatitassianik tunisassiorneq killeqarpoq, nunani pineqartuni filminik TV-kullu aallakaatitassianik tunisassiornermi teknikkikkut pisinnaasat misilittakkallu amigaataaneri pissutaallutik. Nunat Avannarliit Killiit Siunnersuisoqatigiiffiat isumaqarpoq, nunat pineqartut suleqatigiinnerunerisigut nunat pineqartut pingaarutilimmik kulturikkut annertunerusumik ineriartortitsisinnaasut. Tamanna aqqutigalugu Nunani Avannarlerni Killerni filmiliornermik TV-kullu aallakaatitsisarnermi sulisunut imminnut piginnaasanik ilisimasanillu tunioraaqatigiinnermik kinguneqarsinnaasoq.

Filmiliortarnermi TV-kullu aallakaatitassiornermi suleqatigiinnermik nukittorsaanermilu aamma aningaasaqarnermi periarfissanik tunisisinnaavoq, assersuutigalugu, Nunani Avannarlerni Killerni filmiliarineqartunik aamma TV-kkut aallakaatitassianik nunanut avannarlernut allanut immaqalu nunanut allanut tunisassiorneq aqutigalugu.

Tamanna tunuliaqutaralugu Nunat Avannarliit Killiit Siunnersuisoqatigiiffiat nunai pineqartuni naalakkersuisunut kaammattuuteqarpoq, nunani pineqartuni filmiliortarneq aamma TV-kkut aallakaatitassiorneq pillugit suleqatigiinnissaq pillugu isumasioqatigiittoqarnissaanik. Nunat pineqartut siunnersuuteqarfigineqarput tamarmik aningaasartuutissanut tapiissuteqaqqullugit.

Siunnersuutip inatsisartuni siullermeerlugu suliarineqarnera

Naalakkersuisup inassutigaa, siunnersuut tapersorneqassasoq ilisimatitsissutigalugulu siunnersuut KNR-mut tusarniutigineqarsimasoq taakkulu innersuussutigigaat nunat pineqartut pingasut naalakkersuisui filminik TV-kullu aallakaatitassiorneq pillugu suleqatigiinnissamik suliniuteqaqqullugit, kiisalu Islandimi Savalimmiuni Kalaallit nunaanni filminik TV-kullu aallakaatitassiornermik suliallit peqataatillugit isumasioqatigiittoqassasoq.

Assersuutitut KNR-mit innersuussutigineqarpoq, isumasioqatigiinnermut ingerlanneqaqqammersumut peqataasimanermi misilittakkat pitsaasut, taanna The World Indigenous Television Broadcasters Network (WITBN)-mit ukiut allortarlugit ingerlanneqartarluni. WITBN-ip sulissutigaa, TV aqutigalugu nunat inoqqaavisa oqaasisa kulturiisalu nukittorsarneqarnissaat, isiginnaartartut amerlisarnerisigut, nukissanut aqutissat pitsaanagerusut qulakkeernerisigut, ilisimasamik paarlaateqatigiinnermi kiisalu nunarsuarmioqataanermi aqutsinermi suleriutsit nukittorsarneqarnerisigut aammalu aallakaatitassianik paarlaateqatigiinnermi.

KNR-mit erseqqissaatigineqarpoq, aallakaatitassianik paarlaasseqatigiinnermi naatsorsuutigineqartoq aningaasartassaasa ilaatinneqarnissaat. TV-kkut aallakaatitassiat 45 minutsit sivilissusillit nutserneqarnerani allagartalersuinermullu nutserisup sapaatip akunnera ataaseq atortaraa.

Inuit Ataqtigiit aamma Kattusseqtigiit Partiiat siunnersuummut isumaqataapput, takusinnaallugulu suleqatigiinnermi annertunerusumik ineriartortitsisoqarsinnaasoq. Partiiit isumaqarput Canada-mi naggueqativut suleqatigiinnermut ilanngunneqarsinnaasut.

Siumut aamma Atassut tamarmik TV-kkut aallakaatitassat aamma filmiliortarneq ullumikkut kiisalu eqaatsumik suleqatigiissinnaanerup qanoq ineriartortinneqarnissaa pillugu isumasioqatigiinnissamut siunnersuut taperserpaat. Naalakkersuisut piaartumik isumasioqatigiinnerup piviusunnigortinneqarnissaanik suliaqarnissaat partiiit kaammattuipput.

Demokraatit filmiliortarneq aamma TV-kkut aallakaatitassanik suliaqartut peqataatillugit misilittakkanik aamma ilisimasanik paarlaateqatigiinnissaq pillugu isumasioqatigiinnissamut tapersiipput. Partiip erseqqissaatigaa, nunatta karsia tatisimaneqartorujussuummat aammalu isumasioqatigiinnissamut aningaasaliissutissat kultureqarnermut aningaasaliissutinik pioreersunit tiguneqassammata.

Ataatsimiititaliap siunnersuummik suliarinninnera.

Nunat Avannarliit Killiit Siunnersuisoqatigiiffianit siunnersuut ataatsimiititaliamit pitsaasutut isigineqarpoq. Ataatsimiititaliaq isumaqarpoq nunani minnerusuni, soorlu nunani avannarlerni killerni filmiliornermi aamma TV-kkut aallakaatitassiornermi suleqatigiinnermi annertuumik pitsaasumik kinguneqarsinnaasoq, annertunerusumik nunani taakkunani pingasuni takutitsisarnermi nunanullu allanut tunisassiorsinnaanermut periarfissanut tunngatillugu. Ataatsimiititaliap tassunga atatillugu innersuussutigaa, nunat avannarliit allat arlaleriarlutik suleqatigiittarnerat, tunisassianut isiginnaartunik nuannerineqarluartunut atatillugu.

Ataatsimiititaliamit maluginiarneqarsimavoq piffissami kingullermi Kalaallit Nunaannit filmit TV-kkullu aallakaatitassiat suliarineqartut, nunanit allanit soqutigineqarluarnerat, ("Inuk" aamma "A Taste of Greenland") aammalu isumaqarlutik tunisassiat taamaattut Kalaallit Nunaat nunarsuup sinneranut takutilluartaraat takornarissanillu amerlanerusunik tikittoqartarneranut pissutaaqataallutik.

Ataatsimiititaliaq isumaqarpoq, TV-kkut aallakaatitassiorneq aamma filmiliorneq anginerusooq aamma sumiiffimmut tunnganerusooq kalaallit nunaata ilisimaneqarneranut, kiisalu kalaallit nuaanni pinngortitaq kulturilu pillugit ilisimasanik annertusaaqataasinnaasoq, kisiannili nassuerutigalugu filmiliornermi aamma TV-kkut aallakaatitassiorneq nunarsuami unammillerneq ima annertutigimmat kiisalu piumasaqaatit ima sakkortutigalutik nunarsuarmi tamakkua saqqummersinnaanerat ajornakusoorsinnaalluni

Tamanna tunngavigalugu ataatsimiititaliap Nunat Avannarliit Killiit Siunnersuisoqatigiiffianit siunnersuut Nunat Avannarliit Killiit isumasioqatigiinnissaannik tapersorneqarpoq.

Siunnersuutip aningaasatigut kingunissai

Ataatsimiititaliaq isumaqarpoq. isumasioqatigiinnissamut atatillugu kalaallit nunaata aningaasartuutissaasa, aningaasanit kulturikkut aaqqissuussanut aningaasaliissutinit, sapinngisamik konto 30.19.15-imit Nunat Avannarliit Killiit Suleqatigiiffianut aningaasaliissutinit aningaasalerneqassasut.

Ataatsimiititaliap inassuteqaataa

Ataatsimiititaliap isumaqatigiissup aalajangiiffigisassatut siunnersuut akuerisassanngorlugu inassutigaa.

Taama oqaaseqarluni isumaliutissiisummilu allassimasutut paasinnilluni ataatsimiititaliap siunnersuut aappassaanniigassanngortippaa.

Andreas Uldum
Siulittaasup tullia

Hans Aronsen

Harald Bianco

Ruth Heilmann

Aleqa Hammond